



## Herremättli-Clique

Sujet 2009

### Bitriibsunsicher und nit ganz hundert!

Losst me de Ooberschugger freyi Hand,  
denn basiert ebbe-n-emoool allerhand.  
Nit ganz hundert, mit Schnauz und Brille,  
noch em-e-n Oobe in dr Knille,  
voll Elaan und mit beschtem Wille,  
renne si uff dr letschte Rille,  
biirewaich voll in d'Wand!

Die Schuggerbiamte saage sich:

Midenander reede isch jo rächt und guet,  
aaber mir sinn doch die mit Schnauz und Huet.  
Uns liggt's reegelrächt im Bluet,  
z'saage, wo ass es duuregoot  
und z'bistimme wie ass es stoot  
und wie was wenn wo duet.

D'Fasnacht muess äntlig in rächti Baane.  
Es ka doch nit syy, nundefaane,  
ass soo-n-e Chaotehuffe duet und macht,  
dr lieblang Daag bis in alli Nacht,  
was iine grad so in s'Hiirni kunnt.  
Uns wird das langsam zimlig z'bunt,  
mir finde das nimme glatt.  
Als wenn's kai Oornig gäab in dääre Stadt,

Zeerscht nämme mir uns emool d'Wääge voor,  
die sinn soowisoo leschtig und e duurendi Gfoor.  
Mir foordere e Bitriibssicherhaitsbeschyyningung,  
das koschtet uns nyt, mir sinn doch nit dumm.  
Esoo kenne mir alli Verantwoortig entsoorge,  
vom Morgestraich bis am Donnstigmooorge.  
Speeter dien mir denn no s'Abgaas tschegge,  
die Draggadoore stingge jo zem verregge.

D'Guggemuusige sinn denn die näggschte,  
die bleede Sieche und dumme Zwätschge.  
D'Paugge und alli lute Instrumänt,  
gheere in d'Mitti vom Zuug, saggramänt.  
Am Rand usse deerfe numme no die mitmache,  
wo aifach saubleed ummelache.  
Gruusigi und feerchterligi Laarve  
wärde verbotte, wie au Fliigel und Haarfe.  
Und nit zletscht, die wärde stuune,  
gheert e Waarndreyegg an jeedi Posuune!

Als dritts dien mir denn d'Gligge blooge.  
Ooni si voorhäär lang go z'frooge,  
dien mir jeede teschte, uff Algg und Drooge.  
Isch aine zue, oder ebbe gaar high,  
bikunnt är e Betooklotz ans Bai.  
Nadyyrilig numme zer Sicherhait.  
Mir sinn d'Macht und jeederzyt birait.

Au in dr Gruppe uff em Piccolo pfyffe,  
wenn dien die daas äntlig bigryffe,  
duet s'Drummelfäll perforiere  
und zue Gheerschääde fiehre.  
Drumm wärde Oorestepsel bald emool  
zer Pflicht, ze jeedem sym aige Wool.

S'Drummle lenger als e Stund,  
fiehrt bikanntlig zue Hirnschmalzschwund.  
Nit z'vergässe d'Glängg wo lyyde,  
wenn me's ständig duet iibertrybe.  
Als Voorschrift kunnt drumm uuse bald,  
all Viertelstund e Cliquehalt.

Au d'Zuugsladdärne mit offenem Fyyr,  
sinn uns, wääge-n-em Gaas, nit ganz ghyyr.  
Drumm wärde si uff e Index gsetzt  
und näggschtens duur Lyychtre glaame ersetzt.

Hool's dr Gaier und dr Gugger,  
s'wird au in de näggschte Joor,  
fir uns Schrybdisch-Schugger  
offeglegt no männgi Gfoor,  
esoo, ass mir, zem drhinterstoo,  
no männgi Voorschrift kenne uuseloo.

Mir Fasnächtler maine numme:

Nit ganz hundert und uniiberlegt,  
hänn si d'Realität nit ganz tscheggt  
und aifach emool loosglegt  
bitriibsunsicher und nit ganz binenand,  
biirewaich voll in d'Wand.

Bim Schnyzge Karli wäär's nie soo wyt koo,  
das hätt är de Schugger nit duure gloo.  
Es bruucht derzue halt e stargge Rugge,  
nit ain, wo sich numme duet bugge  
und voor dr Verantwoortig drugge.  
Em Hanspi Gass fäält halt aifach dr Maage,  
zem e-ne gheerig d'Mainig z'saage.

S'Resümee vo dääre laide Gschicht:

Mir sinn aagääblig bitriibsunsicher,  
s'Comité isch nit ganz hundert  
und die verantwortlige Ooberschugger  
sinn offesichtlich baides mitenander.....

**Bitriibsunsicher und nit ganz hundert!**

*Vom Bsuech vo dr Waage- und Requisite-Uusstellig bi dr Kasäärne  
und dr Laddärne-Uusstellig uff em Minschterplatz,  
vom Määntig znacht bis am Mittwuch demorge,  
isch uss Sicherheitsgrind dringend ab-z'root!*